

UPA 12 nallertinnagu Naalackersuisoqarfiit suleqatigiillutik inuussutissarsiornermut inatsit siunertaanngitsumik isertortumik akunnermuliuttoqarsinnaanngortitsilluni (stråmandsvirksomhed) Kalaallit Nunaanniit aningaasanik annissuinissaq siunertaralugu nalorninarsinnaasumillu aningaasannanniarluni transfer pricing atorlugu periarfissiinersoq misissoqqullugu, tassunga ilanngullugu piginneqatigiissutinik tuniniaaneq atornagu aningaasaatillillu aningaasanik attartugaralugit aningaasaliineq atorneqarnersoq pillugu Naalackersuisut inuussutissarsiummik ingerlataqarneq pillugu inatsisartut inatsisaanni allanngortitsinissaq siunertaralugu suliaqaqqullugit peqquneqarnissaannik Inatsisartut aalajangiiffigisassaattut siunnersuut
(Inatsisartunut ilaasortaq Kim Kielsen, Siumut)

Akissuteqaat

(Inuussutissarsiutinut Aatsitassanullu Naalackersuisoq)

Siullermeerinnineq

Inuussutissarsiornermut maanna inatsit ulloq 1. januar 2002-mi atuuttussanngorlugu 2001-imi akuerineqarpoq.

Tamatuma kingorna inuussutissarsiornermut inatsit ataasiarluni allanngortinneqarpoq, tassalu 2006-imi. Nunatsinni inuussutissarsiutit annertuumik ineriartorput, soorunalumi tamanna inatsisikkut eqqumaffiginiarneqassaaq malinnaatinneqarlunilu. Naalackersuisut isumaqarput inuussutissarsiutit assigiinngitsut sapinngisamik assigiinnik maleruagassiuunneqassasut.

Nunatta karsianut akileraarutininik akiliinnginnissaq siunertaralugu Kalaallit Nunaannit aningaasanik annissuisinnaanerup nalorninarsinnaasumillu transfer pricing (transfer pricing tassaavoq suliffeqarfissuit nunani assigiinngitsuni angerlarsimaffeartut nunanut akileraarutikinneruffiusunut isertitaminnik nuussinissamik siunertaqarlutik akinik aaqqissussanilluunniit allanik aalajangersaasarnerat.) atorlugu aningaasannanniarinnaanerup akiorniarnissaannut inuussutissarsiornermut maanna inatsit naleqqutinngimmat Naalackersuisut siunnersuuteqartoq isumaqatigaat. Akileraannginnissaq siunertaralugu isertortumik akunnermiliuttunngortitsisarneq akiorniaraanni akileraartarnermut inatsisip misissornissaa immaqalu inuussutissarsiutinut assigiinngitsunut immikkut inatsisit misissornissaat naleqqunnerussaaq.

Taamaalillunga taasinnaavara aatsitassarsiornermut inatsimmi § 16, tassani tranfer pricing atorlugu aningaasannanniarinnaanerit taamaattut pinaveersimatinniarlugit ersarissumik maleruagassaqarmat. Suliffissuaqarfinni pissutsinut atatillugu aatsitassarsiornermut inatsimmi aningaasannngortitsisarnermi immikkut piumasaqaateqarpoq aammalu ingerlatseqatigiiffiit suliffeqarfiup iluani akit piumasaqaatillugu isumaqatigiinniutigineqartassasut. Inatsimmi tassani aalajangersagaqarpoq aningaasanik annissuisinnaanermik akiuiniarnermik imaqartumik taannalu Namminersorneq pillugu Isumalioqatigiissitap suliaanut attuumassuteqarpoq.

Pissutsip tamatuma inatsisini assigiinngitsuni maleruagassiorneqarnissaa tulluurtuunngitsoq Naalackersuisut isumaqarput, soorluttaq aningaasanik annissuisarnerit akileraartarnermut

attuumassuteqartuusut akileraartarnermut inatsisip saniatigut inatsimmi allami maleruagassiuuneqarnissaat kaammattuutiginaangitsoq.

Inuussutissarsiornermut inatsisip nutarterneqarnissaa pisariaqartoq Naalackersuisut isumaqatigaat. Inuussutissarsiornermut inatsit suliassarfiit ilaatigut ullutsinnut naleqqukkunnaarsimavoq nutarterneqarluarsinnaallunilu, taamaalilluni ullutsinnut naleqqunnerulersillugulu immikkut inatsisinut allanut naapertuuttunngorsinnaaqqullugu.

Naalackersuisut paasissutissiissutigisinnaavaat inuussutissarsiornermut inatsit nutarterlugu suliaq maannangaaq aallartinneqarmat. Nutarterinermi tassani inuussutissarsiornermut inatsit naapertuussorinngisat eqqarsaatigalugit sukumiisumik misissorneqassaaq, ilaatigullu isertortumik akunnermiliuttoqarluni ingerlatsinissamut inatsit siunertaanngitsumik periarfissiinersoq pillugu misissorneqarluni tamakku Kalaallit Nunaanni inuussutissarsiornermut inatsisissatut siunnersuummi nutaami pinngitsoortinniarneqassallutik. Nutarterinermi tassani Aatsitassarsiornermut Naalackersuisoqarfik suleqatigalugu Inuussutissarsiornermut Suliffeqarnermullu Naalackersuisoqarfimmit ingerlanneqartumi susassaartut tamarmik suliarni peqataatinneqassapput.

Inuiaqatigiinni ineriartorneq ilutigalugu suleriaatsit nutaat pileriartorput atuisunit suliffeqarfinnillu atorneqalersut. Tamanna inatsisikkut aamma takuneqarsinnaallunilu eqqumaffiginiarneqartariaqarpoq. Aallarnisaasut inerisaasullu Naalackersuisut tapersorsorumavaat. Taamaattumik inuussutissarsiornermut inatsimmi maleruagassat eqaannerulersillugillu pisariillisarneqarnissaat siunertarineqarpoq.

Taamaattumillu Naalackersuisut isumaqarput transfer pricing atorlugu aningaasannanniarnit pillugit apeqqutit akileraartarnermut attuumassutillit inuussutissarsiornermut inatsimmi maleruagassiuuneqarnissaat tulluartaunngitsoq. Taamaattorli inuussutissarsiornermut inatsisip nutarterneqarnissaanik pisariaqartitsineq siunnersuummi taaneqartoq Naalackersuisunit isumaqatigineqarsinnaavoq.

Taamaattumik qulaani pineqartut tunngavigalugit Naalackersuisut siunnersuutip itigartinneqarnissaa inassutigaat.